

SCRIPT OF MORNING GOJRI NEWS BULLETIN 20MAR 2025

1015HRS

مارننگ گوجری نیوز بولیتن 20 مارچ 2025

یوہ آکاشوانی جموں ہے باغ علی طاہرتیں خبر سُنو۔

NIA JAMMU SEARCHES

قومی تحقیقاتی ایجنسی این آئی اے نے گزشتہ روز جموں مانہہ ۲۱ مقامات ور چھاپا ماری کی یہ چھاپا کُج نویں بنائی گئیں ممنوعہ دہشت گرد تنظیمیں سنگ مُنسلک نالے لشکر طیبہ تے جیش محمد دہشت گرد تنظیمیں سنگ جڑیا او جی ڈبلیوز غی تلاش مانہہ ماریا گیا ہیں چھاپہ ماری غے دوران دہشت گردان تے او جی ڈبلیو بشکار رابطان غو پتو دین آلا مواد نانہہ ضبط کیو گيو ہے یاہ تلاشی کاروائی دہشت گردی غی دراندازی بارے ملی اک خصوصی اطلاع غے بعد کی گئی اس کاروائی غے دوران دہشت گردان سنگ ہمدردی رکھن آلا افراد غی رہائش گاہاں غی تلاشی لی گئی۔

PANEL REGULARIZATION

جموں کشمیر سرکار نے چیف سیکرٹری غی قیادت مانہہ اک ۶ ممبری کمیٹی تشکیل دتی ہے جھپڑی بکھ بکھ سرکاری محکماں مانہہ کم کر رہیا کیجول تے سیزنل مزدوران ورکراں مستقل کیا جان بارے اُن غا دیرینہ مطالبہ ور غور کرے گی یوہ پینل سرکاری محکماں مانہہ اُن ور کران غی طرفوں خدمات دین بارے بکھ بکھ پہلوان غو تفصیلی جائیزو لیے گی جھپڑا ان محکماں مانہہ کئی براں تیں غیر مستقل بنیادان ور کم کر رہیا ہیں۔ یوہ پینل اپنی سفارشات غے ہمراہ تفصیلی رپورٹ سرکار نانہہ پیش کرے غو جس غو مقصد بکھ بکھ سرکاری سیکٹراں مانہہ کم کرن آلا ان ملازماں نانہہ روز گار غو تحفظ مہیا کران نانہہ یقینی بنانو ہے۔

LG EDGE 2025

لیفٹیننٹ گورنر منوج سنہا نے کانپور مانہہ منعقد کیا جان آلی تقریب وکشت بھارت سمود ایج ۲ ہزار ۵۲ مانہہ شرکت کی ہے لیفٹیننٹ گورنر نے اس موقع ور بولتا واں سول سماج تے صنعتکاران ور زور پایو جے وے بھارت غی معشیت نانہہ آئندہ سال ۲ ہزار ۶۲ توڑی ۵ ٹرلین ڈالر توڑی پُجان نالے سال ۲ ہزار ۷۴ توڑی وکشت بھارت غا نشانہ نانہہ حاصل کرن ور کم کریں عالمی اقتصادی للکاران ور لوہ پاتاں واں اُنہاں نے بھارت نانہہ عالمی معیار غی معشیت بنان نالے ملک نانہہ مصنوعات تیار کرن غو اک عالمی مرکز بنان غی ضرورت ور زور پایو اُنہاں پنچائیتان تے صنعتاں بشکار مضبوط شراکت غی ضرورت ور زور دتو تانجے گرائی ترقیاتی ٹانچہ نانہہ فروغ دین غے نال نال صحت تعلیم تے اقتصادی موقعا مہیا کرایا جاسکیں۔ اُنہاں نے کاروباری لیڈراں ور وی زور پایو جے وے گرائی صنعتاں نانہہ فروغ دین غے نال نال نوجوانان غی نویں قوت غو استعمال کرتا واں مربوط تے پائیدار اقتصادی باہدا غی خاطر کم کریں۔

SAKEENA WELFARE

سماجی بہبود محکمہ غی وزیر ستینہ اتو غو کہینو ہے جے سرکار جموں کشمیر غی پسماندہ آبادی غی بہبود غی وعدہ بند ہے قانون ساز اسمبلی مانہہ نظام الدین بھٹ غی طرفوں پچھیا گیا

اک سوال غو جواب مانہ وزیر موصوفہ نے غریب معزور بدرگ تے بیمار لوکاں بارے شروع کی گئی بکھ بکھ بہبودی سکیمیں ور لوہ پائی ان سکیمیں مانہ اندرا گاندھی قومی بزرگ پنشن سکیم بیوہ پنشن سکیم معزور افراد بارے پنشن سکیم تے دوجی ایسی سکیم شامل ہیں اُنہاں نے قانون ساز ممبراں ور زور پایو جے وے مستحق افراد توڑی ان سکیمیں گا فائدہ پُجان غی خاطر اہلیت تے اُن لائین درخواستاں گا عمل بارے لوکاں نانہ جانکاری مہیا کراویں۔

CS JAL SHAKTI

چیف سیکرٹری اتل ڈلو نے جموں کشمیر مانہ جل شکتی ابھیان غے تحت پانی غا تحفظ غا سلسلہ مانہ کیجان آلی کوششیں غی اک میٹنگ غی سدارت کرتاں واں جائیزو لیو ہے اُنہاں نے ڈپٹی کمشنراں نانہ ہدایت کی ہے جے وے ضلع پانی تحفظ منصوبا تیار کرن غے نال نال ایم جی نریگا تے سی اے ایم پی اے جیسی سکیمیں بارے وی منصوباں تیار کریں اُنہاں نے جے آئی ایس میننگ تے آبی وسائل غی جیو ٹیگینگ غی ضرورت ور وی زور پایو میٹنگ غے دوران چیف سیکرٹری نے استوں علاوہ گرایاں مانہ زیر زمین پانی تے سکولان تے آنگن واڑی مرکزیاں بارش غا پانی غا تحفظ غی ضرورت وی ظاہر کی چیف سیکرٹری نے افسراں نانہ ہدایت کی ہے جے وے آئیندہ ۲۲ مارچ نانہ پانی غا عالمی دن غا موقع ور ہر پنچایت مانہ جل شپتہ غی تقریبات مانہ لوکاں غی متی تون متی شرکت نانہ یقینی بناویں اُنہاں نے آئیندہ مئی غی پہلی تیں ۷ تاریخ توڑی جل شکتی ابھیان غا مقصد غے تحت آبی وسائل غی صفائی ستھرائی بارے اک خصوصی مہم چلان غی وی متعلقہ عہدیداراں نانہ ہدایت کی ہے۔

TB CAMPAIGN DODA

ضلع ڈوڈھ مانہ ٹی بی غی بیماری غے خلاف شروع کی گئی مہم مانہ تیزی آگئی ہے تے ضلع صحت سماج ڈوڈھ نامہ تنظیم غی طرفوں ٹی بی غا مریضاں نانہ طبی سہولت غے نال نال کھان پین غی ضروری چیز مہیا کرائی جارہی ہیں۔ رڈ کراس غی طرفوں ایسا ۷ مریضاں نانہ کھان پین غی چیز دستیاب کرائی گئی ہیں ضلع غا ڈپٹی کمشنر پرویندر سنگھ نے اس مہم بارے جانکاری دیتا واں دسیو ہے جے اس سکریننگ مہم غے دوران ٹی بی غی بیماریاں غا ۵۶ نواں معاملہ باندے آیا ہیں جن وچوں ۵۲ مریض شفایاب ہو چکا ہیں اُنہاں نے دسیو جے ڈوڈھ ضلع نانہ اس موصی بیماری تیں پاک کیا جان غا سلسلہ مانہ طبی تشخیص تے بیداری غا کماں مانہ باہدو کیو گیو ہے۔

PM MKB

وزیر اعظم نریندرمو دی مُلک تے بیرون مُلک مانہ رہ رہیا بھارتی شہریاں سنگ آئندہ 30 مارچ نانہ آکا ش وانی ور من کی بات پروگرام غا اپنا ماہانہ وار پروگرام مانہ اپنا خیالات سانجہ کریں گا۔ یا ماہانہ وار پروگرام غی ۰۲۱ ویں قسط وے غی۔ لوگ اپنا خیالات تے تجویز ٹول فری نمبر 1800117800 ور ڈائل کر غے روانہ کر سکیں۔ اس تون علاوہ نریندرمو دی ایپ یاہ فر مائی گوو

اوپن فورم ور وی اپنا خیالات تے تجویز روانہ کی جا سکیں یہ تجویز اس مہینہ غی 28 تا ریخ توڑی ہی قابل قبول ویں گی۔ یوہ پروگرام آکا ش وانی، دور درشن، اے آئی آر نیوز ویب سائٹ تے نیوز آن لائن مو بائل ایپ ور نشر تے ٹیلی کاسٹ کیو جائے گو۔ اس تون علاوہ یوہ پروگرام اے آئی آر نیوز، ڈی ڈی نیوز تے وزیر اعظم غا دفتر تے اطلاعات و نشریات غی

وزارت غا یوٹیوب چینلاں ور وی براہ راست نشر تے ٹیلی کاسٹ کیو جائے گو۔ آکاش وانی
اس پروگرام نانہ بندی نشریات تیں فوراً بعد علاقائی زبانان مانہ وی نشر کرے گو۔
